

Kalaallit Nunaanni nunami tamarmi nunalluunniit ilaani aalajangersimasuni aqqusinikkut angallannerup pisariaqartippagu angallatit motorillit ilusaanik kiisalu atortuinik Kalaallit Nunaanni politimesteri immikkut akuersissuteqarluni piffissamik biilit quaannaveeqquteqarlutik angallannerannik sivitsuisinnaanissaa pillugu Naalagaaffeqatigiinni oqartussanut nalunaarutip atuuttut allannngortinnissaa pillugu attaveqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

pillugu

Inatsisinut Ataatsimiititaliap

ISUMALIUTISSIISSUTAA

Siunnersuutit aappassaaneerreqarnerannut saqqummiunneqartoq

Suliarinninnermini Inatsisinut Ataatsimiititaliap ukuninnga inuttaqarpoq:

Inatsisartunut ilaasortaq Isak Hammond, Inuit Ataqaatigiit, siulittaasoq
Inatsisartunut ilaasortaq Andreas Uldum, Demokraatit, siulittaasup tullia
Inatsisartunut ilaasortaq Kristian Jeremiassen, Siumut
Inatsisartunut ilaasortaq Storm Ludvigsen, Inuit Ataqaatigiit
Inatsisartunut sinniisoq Andersine H. Kristiansen, Siumut, ataatsimiititaliamut ilaasortaagallartoq

Inatsisissatut siunnersuummut Inatsisinut Ataatsimiititaliap oqaaseqaatai

Aqquernit sermimik apummillu qallerlutik quasarsigaangata quaannaveeqqutit angallannermi isumannaanissamut iluaqutaasarput, malittarisassalli atuuttut malillugit 1. oktoberimiit aprilip naaneranut taamaallaat atorneqarsinnaapput. Piffissamili 1. majimiit 30. septemberimut nunatta ilaani aqquernit suli sermeqartarput. Taamaattumik piffissami tassani malittarisassanik atuutsitsineq angallannerup isumannaatsuunissaata ajorseriarneranik kinguneqarsinnaasarpoq.

Angallannerup isumannaatsuunissaata pisariaqartippagu nuna tamakkerlugu nunalluunniit ilaani atuuttussamik piffissamik biilit quaannaveeqquteqarlutik angallannerannik sivitsuinissamik Kalaallit Nunaanni politimesteri periarfissinneqarsinnaaqqullugu immikkut akuersissuteqarnissamut aalajangersakkamik ilanngussinissaq siunertaralugu Naalagaaffimmi oqartussanut Naalakkersuisut attaveqarnissaat siunnersuutikkut peqqussutigineqarpoq.

Siullermeerinermi siunnersuut partiinit tamanit Naalakkersuisunillu taparserneqarpoq.

Siunnersuut pillugu politimestereqarfik tusarniaaffigineqarsimasoq Naalakkersuisut akissuteqaataanni allassimavoq.

Inatsisinut Ataatsimiititaliap inassuteqaataa

Ataatsimiititaliap isumaqatigiittup siunnersuut akuersissutigineqassasoq **inassutigaa.**

Taama oqaaseqarluni Inatsisinut Ataatsimiititaliap siunnersuut aappasaaniigassanngortippaa.

Isak Hammond,
Siulittaasoq
Inuit Ataqtigiit

Andreas Uldum
Demokraatit

Kristian Jeremiassen
Siumut

Storm Ludvigsen
Inuit Ataqtigiit

Andersine H. Kristiansen
Siumut